

tum esse, et vidisse corruptionem. Tum quia loquens de Christo, et supponit eum mortuum esse, cum resurrexisse affirmet, et negat vidisse corruptionem.

2. Ratio præterea, qua D. Thomas confirmat assertionem, est optima. Summa ejus est, sicut non decuit Christum corporis morbis et infirmitatibus subjacere, aut ex aëgritudine mori, ne videretur hæc necessitate potius naturæ quam voluntate pati, ita non decuit post mortem pati corruptionem, ne mors ejus naturæ infirmitati adscriberetur. Et in solutione ad primum, addit rationem aliam. Nam Christus mortemassumpsit propter nostram utilitatem; corporis autem mortui corruptio non erat nobis necessaria aut utilis, quia per illam nec mereri jam poterat, nec satisfacere; quinpotius posset esse nobis impedimento, si propter hujusmodi corruptiōē corporis, quispam aut de veritate voluntarie mortis resurrectionis, aut de virtute divinitatis illi corpori conjuncte dubitaret. Atque in hunc modum interpretatur illud Psal. 29: *Quæ utilitas in sanguine meo, dum descendō in corruptionem?* id est, si descendero, seu si corpus meum putrefiat, impeditur fructus et utilitas sanguinis effusi. Quo sensu interpretantur etiam hæc verba Augustinus et Hieronymus. Et est satis accommodatus sensus, quavis spiritualis magis quam litteralis videatur. Tertia conjectura, et satis litteralis, addi potest. Quia cum corpus Christi paulo post esset suscitandum, non oportuit eum in cinerem redigi. Ut enim Origenes notat, lib. 2 contra Celsum, ideo Christus non permisit ossa sua confringi, sed integrum corpus manere voluit, ut significaret cito esse resurrectum; multo magis ergo permittere non debuit corpus suum putrefieri, aut in cineres solvi.

3. *Corpus Christi defunctum suapte natura obnoxium corruptioni.* — In solutione ad secundum sentit D. Thomas corpus Christi mortuum, ac suæ naturæ relictum, naturaliter fuisse corrumpendum, atque adeo divinæ virtutis fuisse omnino incorruptum conservari. Quæ sententia communis est Theologorum in 3, dist. 21 (ubi præsertim videri possunt Scotus et Gabriel), et omnino indubitate videtur. Quia necessario sequitur ex vera compositione mortalis corporis ex quatuor elementis atque humoribus. Quocirca sicut in priori tomo, q. 14, ostendimus, Christi corpus mortale, sublata omnipotentia divina, necessitate quadam naturali fuisse subjectum

passionibus corporis, ita dicendum est de corpore jam defuncto quoad ulteriorem corruptionem ac resolutionem, nisi divina virtute specialiter conservaretur.

4. *Objectio.* — Contra hanc vero doctrinam citari solet Henricus, Quodl. 12, quæst. 12, dicens, corpus illud ex vi solius unionis non potuisse naturaliter corrumpi hoc genere corruptionis. Cui sententiae favet Damascenus, lib. 3 de Fide, cap. 28, dicens corpus Christi fuisse incorruptibile illo genere corruptionis. Sed in hoc non potest esse inter Catholicos controversia, nisi fortasse in modo loquendi. Et imprimis Damascenus seipsum exponit, dicens: *Secundo corruptio- nis significatu* (scilicet per resolutionem) *in- corruptibile, hoc est, interitus expers corpus Domini confitemur, quemadmodum pii Patres nobis tradiderunt;* solum ergo appellat incorruptibile, quia secundum divinam providentiam non potuit talem corruptionis modum pati. Quod recte exposuit Elias Creten., super orat. 1 Nazian., his verbis: *Cum Domini corpus, ut communem cum omnibus essentiam ha- bens, mortale esset, proinde etiam ut alia similia, mortem obibat; at vero ob Verbi in ipsum inscensionem, non jam, ut ipsius naturæ con- sentaneum erat, corrumpebatur, verum ob in- habitantem in ipsum Deum Verbum, a labe, a corruptione integrum servabatur.* Atque admirabili modo hec duo concurrerunt, nempe ut omnium hominum mors in Dominico corpore impleretur, et item mors ac corruptio propter socium Verbum extingueretur. Quocirca, cum hoc genus providentiae et præservationis esset quodammodo debitum ratione unionis, potest dici quodammodo naturale, non quia sola unio per se ac formaliter sumpta sufficeret ad præservandum illud corpus a corruptione, nec quia intrinseca dispositio et qualitas illius corporis natura sua non esset corruptioni obnoxia. Neque enim existimandum est corpus illud statim post animæ separationem fuisse aliqua intrinseca qualitate affectum, quæ vim haberet resistendi omni corruptenti, omnemque peregrinam alterationem impediendi; hoc enim sine ullo fundamento vel auctoritate fingeretur. Hujusmodi enim dispositionem consecutum est illud corpus per resurrectionem; antea vero tale perman- sit, quale exterius apparebat; et ideo lancea aperiri potuit, et potuissent etiam crura ejus confringi, si Deus permetteret, et potuit etiam frigesci; ac denique de facto passum est hu- jusmodi alterationes, usque ad illum gradum,

in quo naturaliter posset conservari absque ulla putrefactione. Neque Henricus, loco citato, docet oppositum; imo expresse dicit quod illud corpus esset putrefactum cursu naturali, et miraculose fuerit præservatum. Addit vero, hoc miraculum sequi ex priori unione, et ideo fuisse futurum divina providentia ita ordinante, etiam si diu dilata esset resurrectio. Sine causa ergo Scot., in 3, d. 21, quæst. unica, Henricum reprehendit, et cum eo de modo loquendi potius quam de re ipsa contentbit.

DISPUTATIO XLI,

In tres sectiones distributa:

DE HIS QUÆ POST MORTEM CIRCA CHRISTI CORPUS FACTA SUNT.

In superioribus disputationibus usque ad Christi mortem explanandam pervenimus; reliquum ergo est, antequam de resurrectione dicamus, ut de partibus separatis, corpore, scilicet, et animo, quid videlicet in utraque illo tempore actum sit, inquiramus. Tria vero potissimum sunt quæ ab Evangelistis narrari videntur facta circa corpus Christi defunctum. Primo, quod latus ejus lancea apertum sit; deinde, quod depositum fuerit de cruce, et præparatum ad sepulturam, ac demum sepultum. De his igitur dicendum est, et obiter adjiciendum quoque quid B. Virgo in hoc mysterio passa sit, ut quamdam vulgi opinionem corrigamus ac refellamus.

SECTIO I.

Utrum Christi corpus in cruce pendens post mortem fuerit ita lancea vulneratum, ut ex latere ejus sanguis et aqua manaverint.

1. Ratio dubitandi esse potest, quia non videtur decuisse ut Christus post mortem novum vulnus acciperet, quia solum propter peccata nostra vulneratus est, ut eis medetur; vulnus autem post mortem susceptum non poterat esse medicina peccati, cum neque rationem meriti neque satisfactionis habere posset. Simili enim ratione dicemus inferius, animam Christi post separationem a corpore nihil amplius passam esse; et D. Thom. fere eodem discursu intulit non debuisse Christi corpus in cineres redigi. Et confirmatur: nam, sicut decuit Christum ante mortem ab hominibus illudi et injuriose tractari, ita etiam deuit post mortem honorari, ut ejus virtus et

divinitas ostenderetur, ut Chrysostomus etiam notavit in demonstratione quod Christus sit Deus. Et hac ratione, speciali Dei providentia factum est ut honorifice sepeliretur; ergo. Propter hanc fortasse causam, quidam hæretici dixerunt Christi, corpus antem mortem fuisse lancea vulneratum. Cujus hæresis auctor dicitur fuisse Petrus Joannes, ut refert Guido Carmelita; et ex illo Castrus, lib. 5 contra hæres., verbo *Christus*, hæres. 10; et Praetulus, lib. 14 Elenchi hæresum, in 20.

2. *Corpus Christi post mortem de cruce pen- dens lancea perforatum.* — *Corpus suum Christus lancea aperire cur permisit.* — Dicendum vero est primo, corpus Christi post mortem, antequam de cruce deponeretur, lancea vulneratum esse, ejusque latus apertum. Assertionis est de fide, quam contra prædictam hæresim definit Clemens V, cum Concilio Viennensi, in Clem. de Summa Trin. et fide Cath., et probatur expressis verbis Joan. 19: *Ad Jesum autem cum venissent, ut viderunt eum jam mortuum, non fregerunt ejus crura, sed unus militum lancea latus ejus aperuit.* Quæ verba, licet expressa sint, tamen ab illo hæretico ita corrumpebantur, ut per recapitulationem postrema verba exponeret, et loco illius præteriti, *aperuerat*, poneret præteritum perfectum, *aperuerat*, ut facilius posset referri ad illud tempus in quo Christus adhuc vivebat. Quam falsam interpretationem damnare voluit prædictum Concilium, cum dixit: *Nos igitur ad tam præclarum Evangelistarum testimonium, et Sanctorum Patrum ac Doctorum communem sententiam, Apostolicæ considerationis (ad quam duntaxat hæc declarare pertinet) faciem convertentes, sacro approbante Concilio, declaramus prædictum Apostolum et Evangelistam Joannem rectum in præmissis factæ rei ordinem tenuisse, narrando quæ, Christo jam mortuo, unus militum lancea latus ejus aperuit.* Et verba Joannis satis convincunt, nam exponere, *aperuit*, id est, *aperuerat*, non est interpretari, sed corrumpere Scripturam. Deinde, adversativa illa, *sed unus militum, etc.*, plane ostendit id factum esse ab uno milite, postquam alii decreverant Christi crura non frangere, eo quod eum jam mortuum invenissent. Ratio vero hujus facti si ex parte militis percussientis inquiratur, dicere possumus cum Chrysostomo, hom. 84 in Joan., et Cyril., lib. 12, cap. 39, id fecisse, ut vel exploraret an vere Christus mortuus esset, vel certe, si non esset, ut eum omnino interficeret, quod facere etiam potuit ut Ju-

dæis placeret, vel temeritate quadam ac ferocia militari. Ante vero quam mortuus existimaretur, nemo ausus esset tale vulnus infligere, tum quia in crucifixorum supplicio hoc non continebatur; tum maxime quia crucifixi permittebant paulatim mori, nec solebat accelerari eorum mors aliis vulneribus infictis. Et ideo, licet Judæi cuperent eo die crucifixorum corpora cito de cruce deponere, non sunt ausi eorum maturare mortem, sed a Pilato id petierunt. Si autem ex parte Dei et Christi ratio inquiratur, permisit ipse lancea latus suum aperiri, primo ut magis testata esset ac confirmata ejus mors; quis enim dubitaret mortuum, cuius latus post tota tanta tormenta lancea apertum conspiceret? Secundo, ut idem vulnus testimonium postea esset veræ resurrectionis, quemadmodum Thomæ fuit. Tertio, propter mysteria sanguinis et aquæ, quæ statim explicabimus. Propter quæ etiam voluit mortuus potius quam vivus hoc vulnus suscipere, ut prius intelligeretur consummata redemptio per mortem, a qua virtus sacramentorum fluxit, et per quam janua regni aperta est. Quæ omnia in apertione lateris, et in effusione sanguinis et aquæ significabantur. Et præterea voluit Christus ante hoc vulnus mori, ut non tam extrinseca necessitate ferientis militis, quam propria voluntate animam tradidisse crederetur.

3. Dubium.— *Eva de costa Adæ dormientis educta, figura Ecclesiae de latere Christi defuncti formata.* — Responsio.— *Christum in sinistro latere lancea vulneratum verisimile est.* — Quod si quis inquirat quo in latere Christus fuerit percussus, dextrone an sinistro, nullum firmum ac certum responsum prebere possumus, quia neque Scriptura id explicat, neque apud antiquos Patres aliquid hac de re scriptum invenitur. Solum dicunt omnes in hoc mysterio impletum esse quod in Adamo et Eva fuerat præfiguratum, quando Eva de latere Adæ dormientis formata est in figuram Christi, de cuius latere dormientis in cruce formanda erat Ecclesia, ut significavit Paulus, dicens ad Ephes. 5: *Sacramentum hoc magnum est, ego autem dico in Christo et in Ecclesia,* et notavit Clemens Papa, in prædicta Clementina; et Eucherius, Rupert., et alii in Genesim; Hieronym., ad Ephes. 5; August., tract. 9 in Joann., et l. 9 in Genes. ad lit., c. 19; et Leo Papa, ep. 22, et alii quos retuli in priori tomo, q. 4, in comment. articul. 3. Quibus addit Tertull., lib. de

Anima, c. 43, sic de Adamo loquentem: *Inde deducimur etiam imaginem mortis jam tunc eum recensere; si enim Adam de Christo figurabat, somnus Adæ mors erat Christi dormituri in mortem, ut de injuria périnde latere ejus, vera mater viventium figuraretur Ecclesia.* Hinc Ambrosius, lib. 5 de Sacram., capite primo, sentit in eo latere fuisse Christum vulneratum, ex quo Eva formata fuit: *Quare (inquit) de latere? quia unde culpa, inde gratia; culpa per feminam, gratia per Dominum Jesum Christum.* Et Ruffinus, in Expos. Symb.: *Si queris (inquit) cur non ex alio membro, sed ex latere potius produxisse dicitur aquam et sanguinem, videtur mihi in latere per costam mulier indicari, quia fons peccati et mortis de muliere prima, quæ fuit primi Adam costa, processit; fons redemptionis ac vitæ de secundi Adam costa producitur.* Conjectant autem viri docti et eruditi Evam de sinistro latere fuisse formatam, in quo vergit cor humanum, propter summum amorem qui inter virum et uxorem esse debet. Eam enim ob causam formata est femina ex viro, ut notavit D. Thomas, 1 p., q. 92, a. 2; et Augustinus, 12 de Civit., c. 26; Theodore, Rupert., et alii in Gen. Hinc ergo conjicere possumus Christum in latere sinistro fuisse vulneratum, tum ut res figuræ responderet; tum etiam ut indicaretur summa ejus charitas erga sponsam Ecclesiam, cuius amore vulneratum erat cor ejus, juxta illud: *Vulnerasti cor meum.* Et eodem amore vulnerari voluit in ea potissimum parte corporis, qua ejus cor hominibus quasi patere posset, intelligerentque sibi aperatum ostium, per quod in cor Christi ingredi, illicque possent requiescere. Unde Augustinus, in Manual., c. 23: *Longinus (inquit) aperuit mihi latus Christi lancea, et ego intravi, et ibi requiesco securus.* Possumus item littoralē rationem adjungere, quia si miles Christum vulneravit, exploratus aut certe perfecturus mortem ejus, verisimile est cor ejus voluisse transfigere. Denique, si divina providentia hoc permisit, ut mors Christi esset magis testata et evidens, convenientius etiam fuit ut in sinistro latere percuteretur. Video tamen huc probabili conjecturæ obstat frequentem usum pingendi imagines crucifixi in dextro latere vulnerati; solet autem hæc pictura in Ecclesia habere auctoritatem, quoniam indicium est antiquæ traditionis et consensionis Ecclesiæ. Sed non constat hanc consuetudinem esse vel universalem, vel antiquam. Quare non est quod nos multum mo-

veat, quanquam nihil etiam sit temere affirmandum.

4. *De latere Christi in cruce verus sanguis et aqua manavit.* — *Cur sanguis et aqua de latere Christi manavit.* — *Sanguinis et aquæ de latere Christi manantis mystica significatio.* — Secundo dicendum est, verum sanguinem veramque aquam de latere Christi aperto fluxisse. Hæc conclusio est de fide, definita ab Innocentio, in cap. In quadam, de Celebrat. missarum, contra quosdam qui negabant existisse veram aquam, sed pituitam, seu phlegmaticum quedam humorem, quem dicebant aquam appellatum, quia in eo aqua prædominatur. Verba autem Joannis in propria significatione esse intelligenda, semper Ecclesia intellexit, et veritas Scripturæ hoc requirit; nam in enarratione præsertim historiæ, non fuisset Joannes usus verbis impropriis et metaphoricis. Deinde inquiero cur aquam improprie interpretentur. Respondent, quia non poterat naturalis aqua de corpore humano naturaliter exire. Sed imprimis non defuerunt Catholici qui hoc negarent. Nam (ut refert Abulens., Parad. 2, c. 29 et 30) quidam dixerunt in corpore humano, cum primum recedit anima et incipit frigescere, naturaliter generari aquam per resolutionem phlegmatis, et ita potuisse accidere in corpore Christi. Quæ sententia præferenda esset præcedenti, si aliter veritas historiæ Evangelicæ consistere non posset; sed non indiget Evangelica veritas philosophica fictione. Quia nec vera aqua tam cito potuisse generari naturaliter, ubi non erat principium a quo generaretur; alioquin fluxisset etiam per foramina clavorum; et ex quocumque corpore humano jam mortuo post alias horas posset naturaliter aqua educi, quod repugnat experientiæ. Concedendum est ergo id non potuisse naturaliter fieri, nec tamen propterea negandum est fuisse veram aquam. Quia etiam non poterat de corpore mortuo naturaliter sanguis effluere, et nihilominus sanguinem proprie interpretamur, quod neque ipsi haeretici negare ausi sunt. Utrumque ergo miraculose accidisse ad mysterium aliquod significandum, Patres Ecclesiæ docent. Primo, ut veritas humanæ naturæ assumpta illo testimonio probaretur, de quo dixit Joannes, 1 Canon., c. 5: *Tres sunt qui testimonium dant in terra, spiritus, aqua et sanguis.* Spiritus enim, clamore valido emissus, et in paternas manus effluent rivi, misericordiarum suavitas, et totius pietatis effectus emanat. Tu, Domine, sacerdos sancte, qui in tempore iracundie factus

es reconciliatio, sancti hujs sanguinis permanentem plenitudinem reliquisti, et beneficium hujs sancti liquoris in perpetuum tradidisti, et constituisti nobis inconsuptionib[er]e potum vivificum, crucis signum, et mortificationis exemplum. Et eleganter Tertullianus, de Baptism., cum e. 9 dixisset, etiam in passione sua Christum dedisse testimonium baptismu aquæ, cum vulneratus est, et aqua de latere prorupit, subdit cap. 16: *Est quidem nobis secundum laracrum, et ipsum sanguinis, de quo Dominus: Habeo (inquit) baptismu tinge, cum jam tinctus fuisse; venerat enim per aquam et sanguinem, sicut Joannes scripsit, ut aqua tingeretur, sanguine glorificaretur; proinde ut nos faceret aqua vocatos, sanguine electos, hos duos baptismos de vulnere perfossi lateris emisit. Quia qui sanguinem ejus credent, aqua lavarentur; qui aqua lavissent, etiam sanguinem potarent.* In quibus verbis tertium etiam mysterium indicat, in aqua, scilicet, et sanguine, duplex fidelium baptisma, nimirum sanguinis seu martyrii, et aquæ seu sacramenti baptismi significatum esse. Quod mysterium notavit clarius Ruffinus, dicta Expositione Symboli, dicens: *Potest etiam intelligi quod duplē gratiam baptismi figura- verit: unam, quæ datur per aquæ baptismum; aliam, quæ per martyrium profusione sanguinis queritur.* Idem mysterium notavit Hieronymus, ep. 83 ad Ocean., dicens: *Latus Christi percutitur lancea; baptismi atque martyrii pariter sacramenta fundantur.* Ultimum mysterium adjungi potest ex eodem Ruffino, eodem loco, his verbis: *Hoc quidem mysticum est (videlicet effundere sanguinem et aquam).* *Ipse enim diverat, quia flumina de ventre ejus procedent aquæ vive; sed produxit et sanguinem, quem petierant Iudei venire super se, et super filios suos. Produxit ergo aquam quæ credentes diluat; produxit et sanguinem, qui condemnet incredulos.*

5. Dubium.—*Responsio.*—*Sanguis et aqua de latere Christi imperiata fluxerunt.*—Unum vero potest hoc loco desiderari, scilicet, quomodo sanguis et aqua fluxerint, an permixta vel separata. Nam in citato loco Cypriani, l. de Sina et Sion, dicitur effluxisse sanguis aqua mistus. Dicendum vero sine dubio est, exivisse impermixta et loco separata, tum quia hoc significant verba Joannis: *Fluxit sanguis et aqua;* tum etiam quia alias non potuisset aqua a sanguine discerni; et tamen in praedicto modo dicendi significatur, distincte potuisse cognosci et oculis videri. Quod signifi-

catur est etiam illis verbis: *Et qui vidit, testimonium perhibuit.* Non enim loquitur Joannes illis verbis de alia persona a se distincta, ut videntur intellexisse qui finixerunt, eum, qui Christum percussit, fuisse cæcum, appellatumque Longinum; atque illo liquore, qui de latere Christi exiit, visum recuperasse, atque ita de illo scriptum esse: *Vidit, et testimonium perhibuit.* Hoc enim apocryphum est. Neque ulla modo est verisimile, militem illum, qui Christum percussit, fuisse cæcum. Qualis enim esse potest cæcus miles? Neque enim constat appellatum esse Longinum, sed potius fertur centurionem eum qui exclamavit: *Vere Filius Dei erat iste,* fuisse Longinum illum qui postea martyr fuit, ut videre licet apud Lippomanum, t. 6, et Surium, t. 2, ex Metaphraste, die 25 Martii, et 16 Octobris. Igitur Joannes in tertia persona de seipso loquitur; ipse enim vidit, et testimonium perhibuit, et verum scribendo dixit. Non potuisset autem (nisi aliud miraculum non necessarium fingamus) videre aquam et sanguinem exuentem, nisi discrete effluenter. Unde Cyprianus, ser. de Pass. Christi: *De latere (inquit) tuo fons egreditur in vitam æternam prosiliens, et de eadem consubstantialique origine divisus limibus aqua et sanguis emanant, ad complementum perfectionemque totius justitiae.* Duo bus autem modis excogitari hoc potest. Primo, ut simul tempore aqua et sanguis exierint, per diversas tamen partes ejusdem foraminis; et si hoc modo factum est, non potuit fieri, sine novo miraculo, ut non permiscerentur.

6. Secundo intelligi potest, prius totum sanguinem exisse, deinde vero aquam manasse. Et hic modus videtur facilior, et accommodatus tum ordini narrationis Joannis, tum etiam mysterio. Prius enim Christus suum sanguinem effudit; multique pie meditantur, totum sanguinem suum in passione fuisse, et in hujus rei signum ac testimonium, id, quod reliquum erat, accepto lanceæ vulnere profudisse. Postea vero effuso sanguine, et quasi pretio soluto, manavit aqua, quæ virtutem sanctificandi ab illo sanguine habitura erat. Unde Hieronymus, dicta epist. ad Oceanum, tractans simul hunc locum, et illum Joan. 3: *Nisi quis renatus fuerit ex aqua, etc.*, inquit: *Quia ab aquis cooperat, finivit in aqua.* Quod si per aquam, fidelem populum significatum esse interpretemur (solent enim in Scriptura aquarum nomine populi significari), recte etiam consonat ut post effusum om-

nino sanguinem de latere Christi, intelligatur Christianus populus, seu Ecclesiæ corpus de illius latere exivisse. Denique hæc etiam successio effusionis aquæ post sanguinis effusione aptissima esse potuit, ut utriusque effusio clare ac distincte discerneretur. Ad rationem ergo dubitandi in principio positam, respondetur, quamvis vulnus lanceæ non fuerit necessarium ad meritum vel satisfactionem, ad mysterium autem et veritatis confirmationem fuisse utilissimum. Addo etiam, quoniam Christus ante hoc vulnus nondum totum suum sanguinem effuderat, atque effusum ostenderat, ideo quodammodo dici posse nondum fuisse finitus tempus patiendi in corpore. Illo autem vulnere suscepito, finita fuit abjectio passionis, et honor gloriose sepulturæ paulo post incœpit, in quo satis virtus et omnipotentia morientis demonstrata est, ut Chrysostomus, citato loco, et D. Thom. hic, art. 2, ad 1, adnotarunt.

SECTIO II.

Quomodo fuerit corpus Christi de cruce depositum, et ad sepulturam preparatum; quidve tunc Beata Virgo passa fuerit.

1. *Christi corpus de cruce depositum quomodo.*—Primo, de depositione corporis Christi Domini de cruce Evangelistæ nihil aliud dicunt, quam Josephum ab Arimatæa, virum nobilem, ac decurionem, seu senatorem populi, obtenta a Pilato facultate, deposuisse seu tulisse corpus Domini ut illud sepulturæ traderet. Quomodo autem id factum sit, neque Evangelistæ explicant, neque fere ab expositoriis aliquid additum reperio. Observari tamen potest primo, dupliciter posse intelligi Christum depositum de cruce. Primo, crucem simul cum corpore tollendo, seu elevando e foramine petræ, in quo posita fuerat, eamque in terra collocando, ac deinde clavis eductis corpus deponendo. Secundo, fieri potuit ut e cruce manente immota, et in suo loco erecta, corpus deponeretur. Quo autem horum modorum factum sit, non constat; et quidem prior videtur facilior, atque paucioribus indigens instrumentis; posteriore tamen indicat communis Ecclesiæ pictura. Et fortasse, quamvis Pilatus dedit facultatem depoñendi corpus, non intelligitur etiam illam dedisse ad tollendam crucem. Solet etiam hoc habere usus Reipublicæ, ut cum aliquis publice damnatur propter delicta publica et

scandalosa, vel corpus ejus maneat in loco supplicii, vel si datur facultas deponendi corpus, saltem maneat patibulum, quasi in signum supplicii ad aliorum terrorem. Hac ergo ratione fortasse accidit ut corpus deponeatur de cruce, non vero crux ipsa e proprio loco tolleretur. Atque hæc forsan occasio fuit, ut crux eo tempore a Christianis non usurparetur, neque in varias partes, pietatis ergo, divideretur, sed integra usque ad tempora Helenæ permaneret, atque ita reperiri posset subtilis terram. Fortasse enim in eodem loco mansit usque ad eversionem Jerusalem, et casu factum est ut ruinis contecta fuerit. Quod significasse videtur Ambros., orat. de Obitu Theodosii, dicens: *Aperit itaque humum, decutit pulverem, tria patibula confusa reperit, quæ ruina contexerat, inimicus absconderat;* et infra: *Poterat fieri ut patibula inter se rui na confunderet.*

2. *O'jectio.*—*Responsio.*—Dices: quid obstare potuit quin B. Virgo, vel alii fideles, saltem clavos reservarent quos Josephus e cruce eduxerat? constat enim non fuisse a fidelibus custoditos, nam simul postea cum cruce ab Helena inventi sunt, ut Ambrosius supra refert, et vulgaris Ecclesiæ traditio habet. Dicere potest aliquis, clavos non fuisse extractos e cruce, sed ab ipsis fixis manentibus, manus ac pedes Christi depositos, quia fortasse ob temporis brevitatem ac celeritatem non licuit eis in eruendis clavis immorari. Tamen hic modus mihi non probatur, necesse enim fuisse foramina manuum ac pedum majora fieri, ut per clavorum capita extrahi possent; non est autem credibile pios homines ausos fuisse corpus Christi, quamvis mortuum, amplius lacerare, atque disrumpere; eo vel maxime quod non nihil erat periculi, ne, dum Christi corpus hoc modo deponebant, os aliquod manuum pedumve confringent. Unde communis sensus Ecclesiæ (quem pictura refert) est, Josephum adduxisse omnia instrumenta necessaria ad clavos eruendos, ut Christi corpus posset de cruce deponi. Potius ergo dicerem, eadem lege qua coactus fuit Joseph corpus tollere, et crucem immotam relinquere, coactum etiam fuisse clavos quoque in ea infixos tanquam potissima supplicii insignia instrumentaque relinquere. Unde, licet ad deponendum corpus Christi illos abstulerit, fieri tamen potuit ut eos iterum in cruce figeret propter dictam causam. Quod si hæc ratio non probatur, ego quidem aliam probabilem non repe-